

Tužilaštvo Bosne i Hercegovine zatražilo je da državni sud produži pritvor Srpku Pustivuku, optuženom za zločine počinjene nad Bošnjacima na području Sarajeva. Državna tužiteljica Vesna Ilić smatra da pritvor treba produžiti zbog opasnosti da optuženi, ako bude na slobodi, ne pobjegne u Srbiju ili da ne vrši utjecaj na svjedoke i saučesnike, ili da naruši javni red i mir. Odbrana se usprotivila prijedlogu Tužilaštva jer smatra da ne postoje "nikakvi uvjeti" da Pustivuku bude produžen pritvor. Sud će odluku donijeti naknadno. Srpko Pustivuk zvani Srle, bivši pripadnik Stanice javne bezbjednosti (SJB) Ilijaš, optužen je da je u maju i junu 1992. godine u selu Gornja Bioča, općina Ilijaš, zajedno s drugim pripadnicima vojske i policije Srpske Republike BiH učestvovao u napadu na civile među kojima su bila i djeca. Prema optužnici, u napadu je ubijen jedan civil, dok su tri teško ranjena. Državno tužilaštvo tereti Pustivuka da je kao milicioner specijalista u SJB-u Ilijaš učestvovao u hapšenju, zarobljavanju i odvođenju bošnjačkih civila u logore i objekte za zatočenje. Obrazlažući prijedlog za produženje pritvora, tužiteljica Ilić je navela kako je utvrđeno da optuženi već dugo ne boravi na adresi na kojoj je prijavljen te da je radio u Srbiji, što otvara mogućnosti za bijeg u tu državu. Pustivukova odbrana je obrazložila da je optuženi podstanar i da se često seli te da je to jedino zbog toga ne stanuje na prijavljenoj adresi. Na kraju ročišta Pustivuk se obratio Sudu BiH naglašavajući da posjeduje samo državljanstvo BiH i da nema gdje da bježi. "Da sam htio, časni sude, za 15 godina sam sigurno mogao da pobjegnem. Nemam zašto da bježim", objasnio je Pustivuk. Pripadnici Državne agencije za istrage i zaštitu (SIPA) su po nalogu Tužilaštva BiH uhapsili Pustivuka 13. jula ove godine. U pritvoru je od 14. jula.

Izvor: www.ilijas.ba